

Na osnovu člana 13. stav (4) Zakona o novčanim podrškama u poljoprivredi i ruralnom razvoju ("Službene novine Federacije BiH", br. 42/10 i 99/19) federalni ministar poljoprivrede, vodoprivrede i šumarstva, d o n o s i

**PRAVILNIK  
O DOPUNAMA PRAVILNIKA O NAČINU I USLOVIMA OSTVARIVANJA  
NOVČANE PODRŠKE PO MODELU POTICAJA PROIZVODNJI**

Član 1.

U Pravilniku o načinu i uslovima ostvarivanja novčane podrške po modelu poticaja proizvodnji – prečišćeni tekst („Službene novine Federacije BiH“, br. 54/21, 46/22, 54/23 i 74/23) iza člana 12. dodaje se novi član 12a, koji glasi:

„Član 12a.

**(Hljebna žita - Obeštećenje proizvodnje radi niskih prinosa i lošeg kvaliteta)**

- (1) Klijent ostvaruje pravo na dodatnu novčanu podršku radi obeštećenja proizvodnje hljebnih žitarica (pšenica i raž), ako je u skladu sa članom 12. važećeg Pravilnika već ostvario pravo na novčanu podršku za proizvodnju hljebnih žitarica u 2023. godini.
- (2) Nadležno kantonalno ministarstvo će na osnovu dokumentacije koju je klijent dostavio do 01.10. tekuće godine za proizvodnju hljebnih žita izvršiti dodatni obračun novčane podrške za obeštećenje proizvodnje hljebnih žita radi niskih prinosa i lošeg kvaliteta, planiranih u izmjeni Programa novčanih podrški za 2023. godinu („Službene novine Federacije BiH“ broj:87/23).  
Ova mjera će se realizovati u skladu sa članom 27. Zakona o novčanim podrškama, tako što će se kroz Aplikaciju za obradu zahtjeva, automatski, na ostvarenu proizvodnju hljebnih žita po hektaru u tekućoj godini obračunati dodatni iznos podrške planiran u Tabeli 1. na stavci A/1-1, Br. 1.a Programa.
- (3) Kantonalno ministarstvo će u roku od 10 dana od dana stupanja na snagu ovog Pravilnika dostaviti Federalnom ministarstvu obračun na dalje postupanje, kako je propisano članom 9. Pravilnika.“

Član 2.

Iza člana 34. dodaje se novi član 34a, koji glasi:

„Član 34a.

Svinjsko meso (tov svinja) – obeštećenje proizvodnje zbog gubitka tržišta uslijed epidemije afričke svinjske kuge (ASK)

- (1) Klijent ostvaruje pravo na dodatnu novčanu podršku za obeštećenje proizvodnje (tov svinja), radi prijevremenog klanja svinja, u cilju prevencije od širenja afričke svinjske kuge, a prije nego iste dostignu tehnološku zrelost koja se traži na tržištu.
- (2) Novčanu podršku po ovom osnovu mogu ostvariti samo oni klijenti koji su ostvarili pravo na novčanu podršku u skladu sa članom 34. Pravilnika, a čije svinje su zaklane u periodu od 10.08. do 10.09. 2023. godine.

- (3) Nadležno kantonalno ministarstvo će obračun novčane podrške za Tov svinja - obeštećenje proizvodnje zbog gubitka tržišta uslijed epidemije afričke svinjske kuge, planirane u izmjeni Programa novčanih podrški za 2023. godinu („Službene novine Federacije BiH“ broj:87/23), realizovati u skladu sa članom 27. Zakona o novčanim podrškama, tako što će kroz Aplikaciju za obradu zahtjeva, za ostvarenu proizvodnju tovnih svinja u tekućoj godini obračunati dodatni iznos podrške za svinje zaklane u periodu iz stava (2) ovog člana.
- (4) Za ostvarivanje prava na dodatnu novčanu podršku iz ovog člana, klijent podnosi dodatni Obrazac zahtjeva Z-1 nadležnom kantonalnom ministarstvu najkasnije u roku od 10 dana od dana stupanja na snagu ovog Pravilnika, uz koji dostavlja u originalu ili ovjerenoj kopiji Potvrdu o izvršenoj objavi životinja u državnoj bazi podataka.
- (5) Obračun novčane podrške za proizvodnju (tov svinja) iz ovog člana vrši se na osnovu dostavljene dokumentacije za ostvareno pravo na novčanu podršku u skladu sa članom 34. Pravilnika, kao i dokaza iz stava (4) i uvjeta iz stava (2) ovog člana.
- (6) Kantonalno ministarstvo će u roku od 10 dana od dana zaprimanja dodatnog Obrasca Z-1 dostaviti Federalnom ministarstvu obračun na dalje postupanje, kako je propisano članom 9. Pravilnika.“

### Član 3.

Ovaj pravilnik stupa na snagu narednog dana od dana objave u „Službenim novinama Federacije BiH“.

**MINISTAR**

Kemal Hrnjić

**Broj:** 03-1-20/1-1285-18/18  
**Sarajevo,** 14.11.2023. godine

## **OBRAZLOŽENJE**

Prijedloga Pravilnika o dopunama Pravilnika o uslovima i načinu ostvarenja novčanih podrški po modelu poticaja proizvodnji

### **I. PRAVNI OSNOV**

Na osnovu člana 13. stav (4) Zakona o novčanim podrškama u poljoprivredi i ruralnom razvoju („Službene novine Federacije BiH“, br. 42/10 i 99/19) kao i Programa novčanih podrški u poljoprivredi i ruralnom razvoju za 2023. godinu „Subvencije privatnim preduzećima i preduzetnicima - Poticaj za poljoprivredu“ („Službene novine Federacije BiH“, broj: 30/23 i 35/23), federalni ministar poljoprivrede, vodoprivrede i šumarstva donosi Pravilnik o dopunama Pravilnika o uslovima i načinu ostvarenja novčanih podrški po modelu poticaja proizvodnji.

### **II. RAZLOZI ZA DONOŠENJE**

U okviru biljne proizvodnje, kod proizvodnje hljebnih žitarica - pšenice i raži u 2023. godini je uslijed nepovoljnih klimatskih i vremenski uslova došlo do smanjenja prinosa po hektaru, kao i količine i kvalitet proizvodnje hljebnih žitarica, zbog čega klijenti nisu mogli prodati svoje proizvode po odgovarajućim cijenama. Iz navedenih razloga je bilo neophodno izdvojiti dodatna sredstva po hektaru, na stavci A/1-1 Br. 1.a Programa, kao pomoć proizvođačima za obeštećenje proizvodnje radi niskih prinosa i lošeg kvaliteta hljebnih žita.

Također, u okviru animalne proizvodnje, kod proizvodnje svinjskog mesa - tov svinja ove godine se u Republici Srpskoj i u dijelovima Federacije BiH pojavila vrlo opasna bolest - afrička svinjska kuga (ASK) od koje je postojala opasnost proširenja bolesti i na Federaciju BiH. S tim u vezi, na prijedlog Sektora za veterinarstvo ovog ministarstva, dostavljena je preporuka svim proizvođačima svinjskog mesa sa prostora Federacije BiH koji još nisu zahvaćeni spomenutom bolešću, da svinje koje su ispunile uslove iz člana 34. Pravilnika o načinu i uslovima ostvarivanja novčane podrške po modelu poticaja proizvodnji – prečišćeni tekst („Službene novine Federacije BiH“, br. 54/21, 46/22 i 54/23) mogu klati i prije dostizanja tehnološke zrelosti mesa, kako bi na taj način izbjegli opasnost od pojave svinjske kuge. Na ovaj način se umanjuje opasnost od izbijanja i širenja bolesti na ostalom prostoru Federacije BiH. U suprotnom bi u slučaju izbijanja bolesti Federacija BiH imala višestruko veće troškove suzbijanja bolesti, neškodljivog uklanjanja i privremenog gubitka mogućnosti uzgoja na zaraženim farmama. Kroz ovu izmjenu Pravilnika bit će omogućeno obeštećenje proizvodnje onim klijentima čije svinje su zaklane u periodu od 10.08. do 10.09.2023. godine.

### **III. USKLAĐENOST**

U pogledu usklađenosti sa pravnim naslijeđem Evropske unije (acquis), ne postoji odredba sekundarnih izvora prava EU sa kojom bi se propis mogao uporediti, radi dobijanja stepena njegove usklađenosti.

Predmetna oblast pravnog propisa - Pravilnik o uslovima i načinu ostvarenja novčanih podrški po modelu poticaja proizvodnji, regulisana je kroz „Nacionalni propis“.

#### **IV. PROVEDBENI MEHANIZMI I NAČIN OSIGURAVANJA**

Službena kontrola i inspekcijski nadzor će se provoditi na način kako je to propisano važećim zakonskim i podzakonskim propisima.

#### **V. FINANSIJSKA SREDSTVA**

Za implementiranje ovih izmjena i dopuna ovog Pravilnika su planirana sredstva u Programu novčanih podrški za poljoprivredu i ruralni razvoj za tekuću godinu i nisu potrebna dodatna sredstva za realiziranje predviđenih mjera.

MAKRO